



*Zulkifli pada majlis pertemuan dengan 30 NGO dan aktivis wanita Islam.*

## Penyelarasan baik NGO wanita Islam bantu perluas dakwah

**Kuala Lumpur:** Penyelarasan lebih baik pertubuhan bukan kerajaan (NGO) wanita Islam dapat membantu memperluas dakwah dan kerja kebajikan, kata Timbalan Menteri di Jabatan Perdana Menteri (Hal Ehwal Agama), Dr Zulkifli Hasan.

Katanya penyelarasan yang kemas dapat memastikan agensi kerajaan menyantuni lebih ramai wanita yang memerlukan bantuan.

“Wanita adalah tonggak utama keluarga, masyarakat dan negara. Sekiranya NGO wanita Islam mempunyai penyelarasan,

kerajaan MADANI dengan kerjasama NGO lain berupaya menyantuni lebih ramai wanita,” katanya pada pertemuan dengan 30 NGO dan aktivis wanita Islam di sini.

Program antara lain bertujuan mendengar pandangan dan masalah yang sedang dihadapi oleh golongan aktivis wanita NGO di negara ini.

Antara yang hadir adalah pendakwah Ustazah Dr Fatimah Syarha dan Prof Dr Zuriati Zulkarnain dari Universiti Putra Malaysia selain wakil HELWA Angkatan Belia Islam Malaysia

(ABIM), SALWA, Pertubuhan Wanita Anggerik Malaysia, Wanita IKRAM, Pergerakan Puteri Islam Malaysia dan Wanita HALUAN.

Zulkifli berkata Majlis Wanita Islam YADIM (MAWIM) akan menjadi penaung kepada gerakan wanita Islam bagi melaksanakan aktiviti dengan dibantu kerajaan dari aspek teknikal.

“Kerajaan MADANI mengambil berat tentang segmen dan hal ehwal aspek wanita. Kita ingin selaras, seragam dan mengukuhkan aktiviti membabitkan NGO wanita ini,” katanya.